

京口耆舊傳



京口耆舊傳

撰人不詳

中華書局

叢書集成初編

京口耆舊傳

中華書局出版發行

(北京王府井大街三十六號)

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之二

統一書號：ISBN7-101-00894-1/K·367

四庫全書提要

京口著舊傳九卷。不著撰人名氏。明楊士奇文淵閣書目。焦竑國史經籍志。皆載其名。亦不云誰作。考書中蘇庠傳末云。予家世丹陽先人。知其狀爲詳。又從其孫嘉借家傳。則作者當爲丹陽人。庠卒於紹興十七年。而作者得交其孫。則當爲南宋末年人也。其書採京口名賢事迹。各爲之傳。始於宋初。訖於端平。嘉熙間。其中忠烈如陳東。經濟如張慤。張績。湯東野。劉公彥。風節如王存。王遂。蔣猷。劉宰。文學如沈括。洪興祖。書畫如米芾父子。雖皆著在史傳。而軼文逸事。則較史爲詳。至湯東野傳。稱明受赦書至。東野謀於張浚。欲置赦。不宜。而宋史浚本傳。稱浚命守臣湯東野。祕不宜。其說互異。證以劉宰漫塘集。湯侍郎勤王錄跋。乃與此書所載合。則足以訂宋史記錄之誤。漫塘集稱陳東於欽宗時。凡六上書。高宗時。凡四上書。宋史東本傳。第云於欽宗時。五上書。高宗時。三上書。證以此書。乃知宋史有據。漫塘集爲傳聞之訛。王鞏甲申雜記。謂陳亢以熙寧八年生。廓與度證以此書。廓中熙寧九年進士。則距生歲止一年。度中元豐三年進士。則距生歲止四年。尤足以糾小說附會之謬。如此之類。不一而足。蓋是書體例全倣正史。每爲一傳。首尾該實。生卒必詳。與諸家雜說隨筆記載。不備端末者不同。故事實多可依據。於史學深爲有裨。文淵閣書目載是書。不列卷數。經籍志則作四卷。今據永樂大典所載。哀合成編。釐爲九卷。考宋史地理志。京口。凡丹徒。丹陽。延陵。金壇四縣。神宗熙寧五年。改延陵爲鎮。併入丹陽。則所存者僅三縣。而此書吳致堯

傳其人在宣和之季，乃仍稱曰延陵人。蓋沿襲舊名，偶然失改。猶漢高帝十一年已改真定爲東垣，而南越王傳猶稱尉佗爲真定人。史氏駁文不足爲據。今仍以三縣分隸，庶從其實。至於諸書所載，互有同異，則併附載各條之下，以資考證焉。

京口耆舊傳卷一

失名 金山錢熙祚錫之校

刁衍子湛孫約等

陳升之子閔閔等

陳汝颯子龍輔等

柳浣

豐有字弟有章等

葛良嗣

焦千之

沈括

刁衍字元賓丹徒人祖禮遇亂自上蔡徙居宣城父彥能仕江南因徙昇州後從徐知諫於潤州樂其風土至李氏時爲昭武軍節度使賜田京口遂家焉衍在江南以父任爲祕書郎集賢校理以文翰入侍李煜常令直清輝殿閱中外章奏李後主少時遣入於廬山精舍庑地爲精舍極一時林泉之勝旣成命宮苑使范源以澄心堂紙寫其圖來上旣卽位以精舍爲開先寺以圖畫賜刁衍藏於家蔡天啓之子佑

籍及見之。江南平，從煜歸朝，授太常寺太祝，病免。太平興國中，李昉、扈蒙在翰苑，勉其出仕，得知睦州桐廬縣。會詔羣臣言事，衍上書諫用刑，請詔天下悉禁五代以來，淫刑酷法，非律文所載者，巡檢使臣所得盜賊亡卒，並送本部法官訊鞠，無得擅加酷虐。古者殺姦凶於四裔，今遠方囚人，盡歸象闕，配役諸務，非便。自今外處罪人，勿許解送上京，殿前引見司鉗黥法具，並付御史，廷尉獄勅杖，不以大小，並付有司，或出中使，或命法官，具禮監糾，以示聖皇明刑謹法之意，皆見施行。再遷大理寺丞，獻文詔試授殿中丞，通判湖州。上疏請定天下酒稅額，修郡縣城隍，條約牧宰，除兩浙丁身錢，禁汙水流屍，凡五事。俄知婺州，遷國子博士，移光州，轉運使，狀其贖優，詔嘉獎。徙知廬州，真宗卽位，上疏請開諫諍之門，塞讒佞之口，無以血氣方剛，而惑於聲色，無以春秋鼎盛，而耽於逸游。案李潛續通鑑，長編載此疏，作無以春秋鼎盛而耽於逸游，無以血氣方剛而惑於聲色，與此書互有倒置。代還案，續通鑑，長編載衍於至道三年九月上疏，疏中語與此書所載合，惟彼標云：比部員外郎刁衍上疏，考之此書，則是時正由光州徙知廬州，因上疏，乃由廬州代還。與續通鑑，長編五異。獻所著本說十卷，得以本官爲祕閣校理，出知潁州，入爲駕部員外郎。案宋史本傳，作入爲比部員外郎，與此書所云駕部五異。錫金紫，改直祕閣，充崇文院檢討。時杜鎬、陳彭年已爲檢討，衍辭，詔許解職。判三司開拆司，預修冊府元龜，加主客郎中。丐外，得知湖州，轉刑部郎中，歲滿，復預編修大中祥符六年書成。案玉海載冊府元龜，以大中祥符八年十一月乙丑上，此書云六年，成與玉海五異。轉兵部郎中，暴中風眩，真宗遣使馳賜金丹，不及卒。年六十九，衍始仕李氏貴盛，歸朝以

純澹夷雅知名。交道崇篤。士大夫推之。所爲文有野編二十卷。子洪。孫約。原注案國史。刁衍昇州人。徙宣地王介甫刁虞部墓誌稱衍葬江寧牛首之北。虞部葬丹徒。遂爲丹徒人。張安道刁刑部墓誌又稱其先渤海人。自晉以後居丹陽。未知孰是。以彥能常從徐知諫於潤。又張安道刑部墓誌後有昭武賜田一節。知其來居京口蓋自是時。又今傳所述履歷皆案墓誌而歐公增景純書稱刁文內翰平生坎軻數年以來。方便亨塗其去大用尺寸間爾。墓誌所載卽不曾掌文翰。晚節乃居閒十六年。亦爲可疑。案王安石虞部郎中刁君墓誌銘稱君曾祖警節度昭信軍卒葬昭信城南。則彥能也。皇祖以尙書兵部郎中直龍閣卒葬牛首山。則衍也。皇考以屯田員外郎卒葬丹徒。故君爲丹徒人。然則墓誌乃謂虞部之父已葬丹徒。故虞部遂爲丹徒人。非自虞部始葬丹徒也。此註謂虞部葬丹徒遂爲丹徒人。與墓誌文義不同。

洪咸平三年進士及第。以儒術發身。長於吏事。初授大理評事。知宣州宣城縣。秩滿。遷大理寺丞。監興國軍大冶縣茶場。兼知縣。代還。遷殿丞。知潮州。真宗東封。遷太常博士。國朝封贈之典。在具慶者。恩不及亡母。東封告成。肆大胥。妻已喪者得敘封。時洪母徐已死。上章以謂妻以笄帚之舊。尙蒙封邑之榮。母以劬勞之恩。不及漏泉之澤。教化之本。輕重未安。朝議然之。故徐氏封高平縣太君。士大夫父在而封及亡母者。自洪始。祀汾隴。遷尙書屯田員外郎。在朝參嘗錄囚於糾察刑獄司。其具獄常五囚重辟。洪閱案。原情理出四人。會京府司錄闕。政府以洪名聞。真宗指之曰。此近嘗錄囚而活人者耶。是此選。遂授開封府司錄。軍巡有重囚。久已抵譴。案抵譴二字出說文。陳水紀聞載鄭俠上疏連及王安國。自陳無此語。臺司引

使使證之。俟見安國笑曰：「平甫居常自負剛直，議論何所不道？今乃更效小人，欲爲抵牾耶？」抵牾二字，與此書可以相證。不承京尹請讞，上記前事，特以召湛，意欲有所平反。湛得其情，因卽服罪。上猶欲原減，湛不可，竟按誅之。其持平如此。丁外艱，服除，通判越州，會闕守攝州事。時境內大蝗，湛潔齋致禱，翌日，迅雷烈風，蝗溺於江。人以爲精意所感。郡城溝瀆久塞，湛率衆疏鑿，引湖水周流城中，俗大便利。及被代，百姓遮留，不忍其去。遂闢形承天寺中，歲時奉祠。遷都官，知廬州。徙壽州，課最召還。授荊湖北路提點刑獄。仁宗登極，遷祠部郎中。徙夔州路轉運使，屬施州洞酋田彥稠、彥安妄干恩典，不遂，卽率宗黨破寨柵，殺吏民，燒官舍，保險爲邊患。案：宋史西南溪峒諸蠻傳云：「乾興初，順州蠻田彥晏率其黨田承恩寇施州暗利，皆不著彥稠之名。此書亦不著承恩之名，與宋史互異。又宋史但云乾興初，此書系其事於仁宗登極以後。考仁宗以乾興元年二月戊午登極，與宋史可以互證。朝廷命將出禁旅討擊，彌年無功，詔湛招輯，會彥稠死，蠻有善意，而武臣欲自爲功，拒不納命，疲於調輸。湛密疏請罷兵，詔以兵屬湛。湛與蠻約，親出野與之歃血立誓。黔中遂安案：宋史西南溪峒諸蠻傳但稱蠻州發兵擊之，俘獲甚衆。明年彥晏納款，據此書則彥晏納款實湛之功。宋史闕書遷刑部，丁內艱，服除，授三司度支判官，閱歲請舒州，以疾丐閒。徙黃州，再請分司西京，遂歸老。案：宋史刁衍傳稱衍子湛登進士第，判部郎中，據此書湛徙黃州之後，分司西京，乃歸老，則不以刑部郎中終也。與宋史小異。湛有風鑒，識歐陽公修於未遇，故湛之亡，修以書唁其子約。敍受知之早，且言後雖有智者，皆莫之先。恬於榮利，昭武賜田甚廣，自衍在時，以貧質於鄉人，田沃衍。

歲入視他田倍蓰。或勸洪贖以自業。洪曰。田誠美。然鄉人致力亦勤矣。何可驟奪。因焚其質劑。分務退居。諸子從官便郡。更相迎養。以致其樂。潛乎自適。凡十有六年。次子約。知婺州。扶侍之官。卒於錢塘。實皇祐元年。享年七十有九。范公仲淹時守錢塘。案范仲淹傳。但云尋徙杭州。未著出守之年。宋名臣言行錄稱。皇祐二年。仲淹領浙西。據此實則。皇祐元年已守錢塘。可與二書相考。資其喪歸。

約字景純。少有盛名。擢天聖八年進士第。爲諸王宮教授。時南班之制未立。宗子非過殊恩。無遷官法。景祐中。宗室欲緣大禮推恩。命約草表。丞相王公曾愛其文詞。遂得旨。有南班之授。宗室以千緡謝。辭不受。寶元中。入爲館閣校勘。慶歷初。與歐陽公修同知太常禮院。其冬。又與修等並爲集賢校理。管當三館祕閣。四年。坐蘇舜欽進奏院祠神飲酒事。出通判海州。案宋史。蘇舜欽傳稱。進奏院祠神。舜欽與右班殿直劉巽。輒用鬻故紙公錢召會賓客。王拱辰諷魚周詢劾奏。坐除名。凡同會被逐者皆名士。又考九朝編年。被逐者王洙。呂臻。章岷。江休復。宋敏求。吳益。柔及刁約。可與此文相證。奉親以行。作戲綵亭。邦人榮之。李清臣賦詩。所謂傳聞綵服朱顏客。已作金章白髮翁。蓋以屬約。皇祐中。仍以校理權吏部南曹。尋爲開封府推官。至和中。溫成皇后上仙。約以厚葬爲非。未奏疏。爲內臣所白。出提點京西刑獄。時知太常禮院校理吳充。鞠真卿。皆以議溫成事黜。時論然之。太常丞直集賢院馮京上言。三人者不當去。亦坐落。案宋史及東都事略。馮京傳。但稱吳充以議溫成事被黜。馮京論不當黜者。亦只充一人。宋陳均九朝編年。亦只及吳充及鞠真卿。而不及刁約。此書著約及吳。鞠三人。與詩書互異。同修起居注。嘉祐初。還朝。判度支院。

假太常少卿直史館使北歸塗戲用契丹疋裂貌狸等爲詩。雖一時諧謔亦爲當世傳誦。還判度支院四年。出爲兩浙運使。還判三司鹽鐵院。出提點梓州路刑獄。八年再判鹽鐵院。還戶部。案元至順鎮江志。子轉運兩浙之後知揚州之前不書判三司鹽鐵院提點梓州路刑獄及再判鹽鐵院還戶部等官。與此書詳略互異。治平中出知揚州。移宣州。熙寧初判太常寺。議講讀官當賜坐。與呂公著等合。後雖不行。識者是之。約性殷勤。篤至。急人之急。甚于己私。在京師賓客無貴賤少長。有謁必報。日不足繼之以夜。故館中頗有走馬多羅之誚。而約實未嘗一登權要之門。故同時輩流。躡進驟遷。而約獨四十年周旋館學。天下士無間識不識。皆稱之曰刁學士。而一世名德相望。前後如范公仲淹。歐陽公修。司馬公光。王公安石。王公存。蘇公軾。皆愛敬之。其告老而歸。存以詩送之曰。平生胸懷爲風義。往還不論賤與貴。騎馬都城四十年。未嘗一毫爲身計。比其死也。軾哭之以詩曰。平生爲人耳。自爲薄如縞。安石祭之以文。亦曰。坦然制行之平裕。然與人之周。既貴賤以同觀。亦始終以相侔。蓋實錄云。約家世簪纓。故所居頗有園池之勝。至約更葺園曰藏春塢。塢西臨流爲屋曰逸老堂。又西有山阜植松其上。曰萬松岡。凡當世名能文者皆有詩。故藏春塢之名聞天下。約從容里閭年八十餘。元豐五六年間卒。兄繹擢天聖二年進士第。授太常博士。歷仕楚蜀。最後通判揚州卒。王安石時簽書淮南節度判官廳公事。有祭文弟紆字公綽。即約出使北回寄南徐二弟詩中所謂族推公綽最溫良者。紆字經臣。以父廕入官。由戶掾歷佐幕府。案歐陽修有贈刁推官紡詩。則知紡曾爲推官。可與此書相證。范公仲淹。歐陽公修。皆有贈送之詩。

陳升之、本建人。國史有傳。墓在縣之五州山。案嘉定及至順鎮江志皆云：升之自建來。丹陽考索名風
晚談錄升之本傳稱：丹陽居第壯大。踰制則又似遷居丹陽者。可與二志互異。二子閎、閔。皆以父任。閎終
宣義郎。無子。閔終大理評事。子愷。以祖恩授承務郎。亦早卒。以從姪鎮爲嗣。終宿州符離知縣。三世並祔
葬五州。升之自建來居。從子豫及禧實與俱來。豫以升之廕終中奉大夫。四子機、桷最知名。機知信州。勅
秦檜妻黨王仲山坐廢。檜死。起知楚州。將漕淮南。終知衢州。桷爲韓世忠軍參謀。凡世忠出師。桷皆在行。
積功爲右文殿修撰。敷文閣待制。卒。三子官皆至陞朝。禧之弟出繼升之後。卽鎮也。再傳而絕。今繼升之
後者。禧之曾孫應岵之子箕。案宋嘉定鎮江志。禧之孫雅言。雅言之子應岵。其應岵之子。

陳汝爽。字公武。丹徒人。自泉之晉江來居。卽三司戶部副使詰之姪。用詰恩補太社齋郎。景祐中。擢進士
第。案元至順鎮江志作寶元。元年登進士第。嘗以文謁范公仲淹。奇之。時光祿卿胡楷屬仲淹擇壻。仲淹
言無踰汝爽者。遂壻胡氏。爲睦州遂安令。繩豪民楊氏以法。縣以大治。改秩知眉州眉山。治有能名。民歌
之曰：明月皎皎。洞毫釐兮。陳公之政。不可欺兮。於時嘉州不治。部使者張公揆檄汝爽攝通判。將使正郡
守及其屬之罪。汝爽到郡。得守之過。卽諷使自改。事有常行。亦自守行之。郡以大治。而守若屬皆得善去。
眉山士民請於使者。寧毀吾廬。毋奪吾父。使者以益州交子務出納叢雜。舉爲監務。益帥張公方平薦之。
通判郫州。郫守吳公奎亦薦之。選知秀州。求省松楸。得知邵武軍。除知海州。以歲饑。不俟報發廩賑民。爲
監司所奏。汝爽亦上章請以身坐。毋及寮屬。朝廷嘉之。置不問。毋憂去官。汝爽性恬靜。自熙寧初。官已至

太常少卿。不求遷者十五年。及是嘆曰。仕本爲養。養不及矣。何以仕爲。除喪。乞分司西京。遂告老。時年六十五。居閒。日以飲酒賦詩爲樂。凡十有四年。乃卒。葬丹徒縣義里鄉之黃山。中間以覃恩及子封敘。轉至太中大夫。卒之前一日。召子及孫戒以清白忠恕曰。行此足以保家。子龍輔。

龍輔字寶臣。登嘉祐二年進士第。爲濟州司法。衢州常山令。改秩。知開封府扶溝縣。知興化軍。秩滿。遂不仕。柳庭俊爲撰墓誌。稱其賦性寬明。居官清謹。恬於名利。篤於孝養。自莆田易守宜。春汝輿已休致。氣體康強。安車迎侍。過晉江上。家人以爲榮。晚年集古今忠臣孝子凡修身治人可爲法者。總三十卷。號曰傳家至寶。以遺子孫。其卒亦葬黃山。孫孝友。字德仲。未改秩而卒。孝恭字溫仲。年十四入郡學。十八貢太學。有盛名。宣和三年。以上舍擢第。爲萊州膠水簿。婺州兵曹掾。改司參軍。監溫州天富監及永嘉鹽場。改秩。知宣之涇縣。秀之華亭。教授臨江軍。除諸王宮大小學教授。國子監丞。丐外。得知岳州。卒於官。爲人廉謹。死之日。家無餘資。葬金壇縣上元鄉之西張莊。柳況。丹徒人。擢慶歷六年進士第。爲陝西司理參軍。以政績聞。特改大理寺丞。鄭獬當制。其詞云。本道使者曹元舉等言。而廉謹治官有善狀。章下有司。有司以爲績效明白。如章所言。乃陞爾以廷尉丞。爾其祗踐。以稱懋功之意。

豐有字。字寶臣。弟有章。字漢臣。丹徒人。兄弟相勉以學。有字以學究出身。歷知處州青田。溫州樂清。江寧府溧陽縣。終虞部員外。治家有法。居官廉平可紀。有章擢皇祐元年進士第。終觀部郎中。有字孫漸。字仲

升登紹興十五年進士第。釋褐泰州海陵簿。未上而卒。淵字仲深。紹興八年進士第。主平江府長洲簿。教授太平州。改秩。知平江府吳縣。卒。今城中諸豐皆其裔也。

葛良嗣字興祖。丹徒人。王安石爲撰墓誌。稱其先家處之麗水。父度支郎中源。徙居明州之鄞。死葬丹徒。故爲丹徒人。博知多能。數舉進士。角出其上。而克厲修潔。篤於親友。慨然欲有所爲。以效於世。年四十餘。始以皇祐五年進士出仕。州縣十餘年。終於許州長社縣主簿。興祖於仕未嘗苟。聞人疾苦。欲去之如在己。其所臨視。雖細故人。不以屬耳目者。必皆致其心。論者多怪之。曰。興祖且老矣。弊於州縣。而服勤如此。余曰。是乃吾所欲於興祖者。夫大仕之則奮。小仕之則怠。忽不治。非知德者也。興祖聞之。以余言爲然。安石又作良嗣挽詩云。憶隨諸查附青雲。場屋聲名看出羣。孫寶暮年曾主簿。卜商今日更修文。山川凜凜平生氣。草木蕭蕭數尺墳。欲寫此哀終不盡。但令千載少知君。子繫嘗知鎮江府。蘊亦擢嘉祐八年進士第云。

焦千之字伯強。丹徒人。嚴毅方正。歐陽公修敬待之。常館修家。累試不利。修以書勞之。其一勉之以孟子不動心之勇。二則勉之棄去科場文字。專意經術。趙康靖公槩之守鄆。修以書薦之云。千之久相從。篤行之士。專心學古。不習治生。得招致鄆學。不止千之可以自托。其於教導必有補益。亦爲政之一端。比修之守潁。呂公公著適通判州事。請于修。延之教子。公著去潁。復攜以歸。修以詩送之。所謂焦生獨立士。勢利不可恐。誰言一身窮。自待九鼎重。有能揭之行。可謂仁者勇。呂侯相家子。德義勝華寵。焦生得相隨。道合

若膠鬲者也。公著之子希哲爲長。時方十餘歲。承父母之訓。肅敬天成。千之不少假借。小有過差。卽端坐召與相對。終日竟夕。不與之語。希哲恐懼畏服。千之方略降詞色。異時希哲德成行立。爲世耆儒。家傳推本以爲由千之化導之篤。嘉祐六年。諸路舉行義之士赴京師館太學。試舍人院。賜出身者七人。案九朝編年。嘉祐六年五月授顏復等官。先是諸路舉行義文學之士二十三人。至者十六人。皆館於太學。卽舍入院。試論策。賜出身五人。此書云七人。與九朝編年互異。徐州顏復爲首。千之次之。爲國子監直講。熙寧初。以蘇嘉對公試策論時政之失。千之與顏復等爲考官。案九朝編年。但稱顏復爲考官。不及千之。與此書互異。擢居上等。直講蘇液以白執政。千之與同列五人俱罷。以殿中丞爲樂清令。歐陽修以書勉之云。更當屈伸取舍。要於濟務。蓋以千之方剛。不能善事上官故也。八年。知無錫縣。是歲大旱。運河涸。用單鏹言。車梁溪水灌運河。五日而通流。舟楫無滯。事見蘇文忠公軾錄奏單鏹吳中水利書。軾有從千之求惠山泉詩。正其作縣時也。案蘇頌文集三十四卷外制內有除國子監直講焦千之爲大理寺丞勅一篇。考之此書千之未嘗除大理寺丞。與頌集異。勅內有云。外內更試。於今五年。進講卿寺之屬。仍蒞師儒之班。考此書千之既罷直講。以殿中丞出爲樂清令。及無錫令。證之勅所云。外內更試。則大理寺丞之擢當在出知外縣之後。而勅題惟追溯國子直講蓋義主錄用。略其降官也。與此書異。同可以互考。

沈括字存中。杭人。居丹徒。國史有傳。初括壯年嘗夢至一處。登一小山。花如覆錦。而喬木蔽其上。山之下有水澄澈。夢中樂之。將謀居焉。自爾歲嘗夢至其處。後十餘年。有道人爲括言京口山川之勝。且云。郡人

有地求售。括以錢三萬緡得之。後十餘年。道京口。至所買之地。恍然乃夢中所游。因號夢溪。遂莫居焉。括博學善文。於天文、方志、律歷、音樂、醫藥、卜算。無所不通。皆有論著。居八年卒。歸葬故里。子孫有家。京口夢溪。他屬久矣。

